

समे 18:15 Hrs



Headlines

- जम्मू-कश्मीर च कुदरती क्रोपियें दा कैहर जारी, रियासी ते रामबन जिले च लास-पस्सियां पौने ते बददल फटटने करी 11 लोकें दी मौत, बचा अभियान जारी, उपराज्यपाल मनोज सिन्हा होरें राहत ते बचा अभियानें दा जायजा लैता।
- मुखमंत्री उमर अब्दुल्ला होरें खराब मौसम दे मद्देनजर खतरे दी शेंका आले इलाकें थमां लोकें गी बेल्लै सिर सुरक्षित बाहर कडुने दे निर्देश जारी कीते न।
- जम्मू-कश्मीर च फसें दे यात्रियें दी मदाद लेई जम्मू थमां विशेष रेलगड्डियां चलाइयां गेइयां न। जम्मू-श्रीनगर राष्ट्रीय जरनैली सिडक अज्ज उप्परोतली 5में ध्याडे बी बंद ऐ।
- जम्मू ते केंई सारे इलाकें च बुरी चाली प्रभावित होई दी पानी दी सप्लाई गी दिक्खदे होई जम्मू-कश्मीर सरकारै पीने आले पानी दी दस्तेयाबी यकीनी बनाने लेई इलाकें साहबै अधिकारियें दी नियुक्ति कीती ऐ।
- ते मौसम विभाग नै अज्जै थवां औंदी 2 सितम्बर तोड़ी जम्मू खिते च भारी बरखा दी पेशगोई कीती ऐ, खराब मौसम दे मद्देनजर जुनियर इंजीनियर (सिविल) दा स्तेहान इक बारी फ्ही अगडा पाई दिता गया ऐ।



Cloudburst Landslide

जम्मू खिते दे रियासी ते रामबन जिले च पिच्छले 12एं घैंटे च बक्ख-बक्ख घटनाएं च 11एं लोकें दी जान जाने करी लगातार बरखा नै जम्मू-कश्मीर च परतियै कुदरती क्रोपियें गी पैदा कीता ऐ। रियासी जिले दे बददर ग्रां च बड्डे पैमाने पर लास-पस्सियां पौने करी महौर सब-डिवीजन च इक घर तबाह होई गया- जेहदे च

इक्के परोआर दे 7 सदस्ये दी मौत होई गई। दुर्घटनाग्रस्त मकान मलबे हेठ दबोई गया हा। इक होर घटना च रामबन जिले दी राजगढ़ तहसील दे द्रुपदा ग्रां च बददल फट्टने कन्नै चंऊ लोके दी मौत होई गई ते इक माहनू अजे बी लापता ऐ। बचा अभियान जारी ऐ ते अधिकारी मौके पर मौजूद ना।

तोंआई एल.जी. मनोज सिन्हा, मुखमंत्री उमर अब्दुल्ल, उपमुखमंत्री सुरिंदर चौधरी ते होरनें मंत्रिये दवै घटनाएं पर डूंहगा बसोस प्रकट कीता ऐ। इक सोशल मीडिया पोस्ट च एल.जी. होरें जानकारी दिती जे उनें वरिष्ठ अधिकारिये कन्नै गल्ल कीती ते स्थिति दा जायजा लैता। बचा ते राहत अभियान जारी ऐ ते प्रभावित लोके गी हर मुमकन मदाद दिती जा रदी ऐ।



CM Evacuation

मुखमंत्री उमर अब्दुल्ला होरें जिला प्रशासनें ते आपदा प्रबंधन प्राधिकरणे गी निर्देश दिते न जे ओ अपने अमले ते अधिकारिये गी जमीनी सतह पर तैनात रक्खन तां जे 24 घंटे निगरानी दे कन्नो-कन्नो खतरे आले इलाके थमां बसनीके गी बेल्लै सिर बचाइयै कडुने ते प्रभावित परोआरे गी फौरी राहत ते हर मुमकन मदाद उपलब्ध करोआना यकीनी बनाया जाई सकै। उनें मुतलका मैहकमे गी हिदायतां दितियां न जे ओ सौहगे सतर्क रौहन्दे होई आपूं-चै नेडमा तालमेल बनाइयै कम्म करन ते खराब मौसम दे दौरान कीमती मनुक्खी जानें गी बचाने लेई हर ऐहतियाती उपा गी तोड़ चाढना।



Railways Highway

फसे दे यात्रिये दी मदाद आस्तै रेलवे नै अज्ज जम्मू थमां दंऊ बशेश रेलगड्डियां चलाइयां। एह रेलगड्डियां दपैहरी लै 3 बजे ते संजा 5 बजे रवाना होइयां। पैहली गड्डी नमीं दिल्ली- ग्वालियर ते भोपाल होंदे होई महूऊ आस्तै चली जिसलै के दुई गड्डी लुधियाना-मुरादाबाद- गोंडा ते बस्ती होंदे होई छपरा आस्तै रवाना होई।

तोंआई 26 अगस्त गी बारी बरखा दे कारण लास-पस्सियां पौने करी जम्मू-श्रीनगर जरनैली सिडक (NH44) लगातार पंजमें ध्याड़े बी बंद रेई। सिडक दे बंद होने करी 2 जहार कोला मतियां गड्डियां फसी दियां न- जेहदे करी ईंधन ते जरुरी चीजें-बस्तें दी कमी होई गई ऐ। BRO दी इक टीम 24 घैंटे कम्म करी रदी ऐ ते मेद ऐ जे सिडक पर तौले गै ट्रैफिक ब्हाल होई जाहगा।



Udh. Relief Van

उधमपुर दियें डिप्टी कमीशनर सलोनी राय होरें चनैनी च हाड़ें दी मारै हेठ आए दे परोआरें गी राशन ते होर दूआ राहत सरबंधी समेयान उपलब्ध करोआने लेई जरुरी चीजें-बस्तें कन्नै लदोई दी इक गड्डी गी अज्ज झंडी दस्सियै रवाना कीता। डिप्टी कमीशनर होरें दस्सेया ऐ जे ए राहत समग्री हाल च आए दे हाड़ें करी प्रभावित होए दे परोआरें लेई ऐ। उनें इब्बी दस्सेया जे केई सारी टीमां जमीनी सतह पर लगातार कम्म करियै होए दे नुक्सान दा जायजा लै करदियां न ते कन्नै राहत ते आबादकारी मुतल्लक हीले बी यकीनी बना करदियां न।

तोंआई जिला प्रशासन उधमपुर आसेया चन्नी ते कशिरा पंचैते च हाड़ें करियै प्रभावित होए दे 40 परोआरें गी आसरमा ते खुराक उपलब्ध करोआई जा रदी ऐ। ADC प्रेम सिंह होरें एकडे परोआरें कन्नै मिलियै, इस गल्ला दा भरोसा दोआया ऐ जे राहत ते बचा अभियानें गी युद्ध स्तर पर तोड़ चाढेया जा रदा ऐ।



Water Disruptions

जम्मू च पिच्छले दिने चानचक्क आए दे हाड़े करियै केई सारे इलाकें च बुरी चाली प्रभावित होई दी पानी दी सप्लाई गी दिक्खदे होई जम्मू-कश्मीर सरकारै पीने आले पानी दी दस्तेयाबी यकीनी बनाने लेई इलाकें साहबै अधिकारियें दी नियुक्ति कीती ऐ। इस सरबंधै च जारी हुकमै च आक्खेया गया ऐ जे पुर्नब्हाली आले कम्मं गी

पैहल दी बिनाह पर तोड़ चाढेया जा रदा ऐ ते जिस्सलै तोड़ी पानी दे सप्लाई सरिस्तें गी ब्हाल नेंई करी दिता जन्दा तदु तक्कर प्रभावित परोआरें गी पानी उपलब्ध करोआने लेई आरजी बंदोबस्त कीते गे न। पीने आले पानी दी बड़ी मती किल्लत झल्ला करदे लोकें गी ए सलाह दिती गेई ऐ जे ओ अपने सरबंधित इलाकें लेई तैनात कीते गेदे अधिकारी कन्नै राबता करन। प्रशासन नै लोकें गी अपील कीती ऐ जे ओ चुनौतियें भरोची इस अवधि दौरान प्रशासन दा सहयोग करन तां जे तौले शा तौले पानी सप्लाई आली व्यवस्था गी ब्हाल कीता जाई सकै।



Weather -Exam

मौसम विभाग नै अज्जै थमां लैइयै औन्दी 2 सितम्बर तोड़ी जम्मू, कठुआ ते साम्बा च भारी थमां बड़ी भारी बरखा भरने ते उधमपुर, रियासी, राजौरी, रामबन, डोडा ते किशतवाड़ च दर्मेयाने दर्जे थमां भारी बरखा भरने दी पेशगोई कीती ऐ। बसनीकें, खासकरियै हाडें ते लास-पस्सियें दी शेंका आले इलाकें दे बसनीकें गी सलाह दिती गेई ऐ जे ओ सौहगे सतर्क रौहन ते सब्भै लोड़चदे ऐहतियाती हीले करन। प्रशासन आसेया मौसम दे सूरतेहाल पर लगातार निगरानी रक्खी जाल रदी ऐ ते लोकें दी सुरक्षा यकीनी बनाने लेई बेल्लै-बेल्लै सिर महत्वपूर्ण जानकारियां उपलब्ध करोआइयां जागंन। मौसम विभाग दी पेशगोई गी दिक्खदे होई जूनियर इंजीनियर (सिविल) दी असामी लेई औंदी 7 सितम्बर गी लैता जाना तय होए दा OMR अधारित म्तेहान अगड़ा पाई दिता गया ऐ। ए म्तेहान पैहले 31 अगस्त गी लैता जाना हा पर खराब मौसम दे चलदे इसी 7 सितम्बर लेई अगड़ा पाई दिता गया, पर हून खराब मौसम दे मद्देनजर ए म्तेहान 7 सितम्बर गी बी नेंई लैता जाग। जारी हुकमै मुजब इस म्तेहान लेई नमीं तरीक दा ऐलान बक्खरे तौरा पर कीता जाग ते मेदवारें गी ए सलाह बी दिती गेई ऐ जे ओ एदे लेई बोर्ड दी अधिकारिक वैबसाईट गी नियमित तौरा पर दिक्खदे रौहन।



Itoo Education KMR (Byte)

शिक्षामंत्री स्कीना इत्तू होरें कश्मीर खिते च 458 टीचिंग ते नॉन टीचिंग कर्मचारियें दी तरक्की दी घोषना कीती ऐ। सोशल मीडिया पर जानकारी सांझी करदे होई मंत्री होरें आक्खेया जे एह कारवाई शिक्षा खेतर गी

सुचारु बनाने आस्तै सरकार दे चला रदे जतनें दा हिस्सा ऐ। उनें अगगे आक्खेया जे अधिकारिक तौरा पर तरक्किये दे हुकम तौले गै जारी करी दिते जागंन। इस गै कन्नै प्रशासनिक दक्षता बधने ते कर्मचारिये दा मनोबल बधने दी मेद ऐ। स्कीना इत्तू होरें इस खेतर दे शैक्षिक विकास च उन्दे योगदान गी स्वीकार करदे होई तरक्की हासल करने आहले सब्भनें लोकें गी शुभकामनां बी दितियां।

